

Dudischavla radunonza generala dil

Forum cultural Tujetsch

Venderdis, ils 13 da november 2009, allas 20.00 uras el Museum la Truaisch, Sedrun

Protocol

1. Beinvegni e presenza

Cun plascher beneventa il president dil Forum cultural, sgr. André Schmid, las quendisch personas ch'ei arrivadas el Museum La Truaisch per vegnir informadas davart las activitads dil forum. Ord vesta culturala ei il museum in center da cultura ed in adattau liug da sesida pil Forum cultural. El sa aunc communicar la suandontas perstgisas: Pancrazi Berther, president communal, Tumaisch Valier e Guido Friberg.

2. Elecziun d'in dumbravuschs

Sco dumbravuschs vegn Norbert Vinzens proponius ed eligius.

3. Prelecziun ed approbaziun dil protocol dalla radunonza generala dils 21 da november 2008

Entras il nuder vegn il protocol prelegius. Senza remarcas vegn el approbaus cun admitter igl engraziament per la redacziun.

4. Rapport annual 2008/09

Il president dil Forum orientescha cun plascher davart il succediu el decuors dapi la davosa radunonza generala. El ei satisfatgs dalla lavur e fa attents ils presents sin las suandontas activitads:

Ovras da pader Baseli Berther, tom II

Ils 30 d'october havein nus astgau presentar alla publicitad il secund tom da nies historiograf tuatschin. Suenter il tom I cul cuntegn da lavurs historicas dalla val ei ussa era il tom II cun lavurs sur dalla vischnaunca da Mustér ed il cumin dalla Cadi cumparius. Il tom cuntegn era ina fetg voluminusa biografia dil pader. La presentaziun ha giu liug ella sala dalla claustra a Mustér. Lein sperar ch'il cudisch opereschi el senn da pader Baseli e semetti sin viadi e semni responsablada per cultura e historia, oravontut el pievel dalla Cadi.

Descriziun dalla Val Tujetsch

Ils davos treis onns ei quella ediziun vegnida preparada e redigida da dunna Ursula Scholian. Il Forum ha dall'entschatta enneu susteniu ed accumpignau quell'ovra. Pader Placi a Spescha sto haver giu ina tut speciala simpatia per la val, scrivend el 1805 ina aschia voluminusa lavur sur da Tujetsch. Il cudisch vegn presentaus ils 27 da november 2009.

Project Giuv

L'idea fundamentala ei da salvar enzatgei pauc dalla structura da quella ucliva. Ils tetgs dils dus baghetgs dueien retscheiver ina cuvrida da slondas e l'intenziun fess quella da plazzar ulteriurs faners en lur vischinonza.

Calender 2010

Il calender ei daventaus tradiziun sco era lavur culturala enten presentar Tujetsch cun fotografias veglias. Il calender 2010 porta fotografias dad Eugen Berther, Bellevue/Rueras.

Casti da Putnengia

Las empremas lavurs han entschiet 1999. Diesch onns ein pia vargai. Per dus onns ei la lavur stada eri. Uonn havein cuntinuau grazia al sustegn da projectaziun dil cantun. Cun agid da pliras uniuns ei il material entuorn la tuor vegnius allontanaus. La reconstrucziun da mirs da sustegn el nord e sid han dau agl entir complex in'otra pareta. Quels ein stai vegni proponi dalla tgira da monuments cantunala. Quels mirs, sco era l'allontanaziun dil material el vest ed ost ein stai a nus fetg beinvegni. Gl'entir ambient dalla tuor che formava in complex pli vast fa ussa ina pareta da pli gronda cumparsa. La vesta viers Sedrun ei magnifica.

Scarsinaria e filanteria

Il cudisch da Fernando Jacomet, Sedrun, sur dall'industria da launa sisum il vitg da Sedrun dat in maletg historic d'ina ordvart interessanta industria ella val. Il Forum ha susteniu l'ediziun.

Fiasta dil vitg

Era il Forum ha fatg part dalla fiasta e presentau sia lavur als visitaders. Igl ei impurtont da far

enconuschet nosa lavur e sensibilisar la populaziun per la cultura ed il manteniment da quella. Aschia havein nus presentau il project da Putnengia, mussau e visau vi sin la vasta litteratura sur da Tujetsch e presentau nos calenders dils davos onns.

Barschament da Selva

Il museum ei ina part essenziala dalla cultura indigena. Bugen e cun grond plascher havein nus mirau la presentaziun dil fatg historic d'avon 60 onns, igl incendi dil vitg da Selva, ils 11 da zercladur 1949.

5. Rendaquen, rapport dalla revisura ed approvaziun dil quen

Il quen 2008/09 ha la cassiera Nicolina Cathomen-Giossi presentau a moda zun simpatica. Ella dat ina survesta davart las entradas ed expensas essenzialas e presenta la bilanza:

Survesta quen ordinari:

Entradas	11'864.25
Expensas	7'684.55
Fatg anavon	4'179.70
Bilanza:	
Saldo dils 01-11-2008	23'806.75
Saldo dils 01-11-2009	27'986.45
Fatg anavon	4'179.70

Survesta quen conto Putnengia:

Entradas (2003-2009)	162'732.40
Expensas	124'115.75
Saldo per ils 1-11-2009	38'616.65
Bilanza:	
Saldo dils 01-11-2008	40'577.60
Saldo dils 01-11-2009	38'616.65
Fatg anavos	1'960.95

Suenter la posiziun positiva dalla revisura da quen, dunna Barla Monego, vegn il quen approbaus cun dar scaria a cassiera e suprastonza ed engraziar per la buna lavur en favur dallas finanzas dil Forum.

6. Contribuziun annuala

Sin proposta dalla suprastonza dil Forum vegn la contribuziun annuala laschada sco tochen dacheu.

7. Elecziuns:

Suprastonza: president André Schmid ed actuar Tarcisi Hendry vegnan reelegi cun in ferm applaus. Suenter dus onns seretila la cassiera Nicolina Cathomen-Giossi. Deplorablamein eisi buca stau d'anflar ina succesura ni succesur. Ils presents han, sin explicaziun e giavisch dil president, surschau alla suprastonza da mirar per ina persuna en suprastonza e far l'elecziun en in onn. Sco revisura da quen vegn dunna Barla Monego-Venzin reelegida cun in ferm applaus. Il president engrazia als presents per la reelecziun ed engrazia a tuts pigl engaschi en favur dil Forum. Alla partenta Nicolina admetta el in sincer engraziament per la buna lavur duront quels dus onns.

6. Projects 2009/10

Putnengia

El center dil program da lavur stat per uonn la sanaziun dil casti da Putnengia. Cun primavera ei previu d'allontanar cun agid d'entginas uniuns indigenas il material entuorn la tuor. Lu suonda la sanaziun dils mirs dalla tuor ed ils mirs el contuorn. El decuors dalla primavera vegn il survetsch archeologic cantunal ad allontanar tut material egl intern dalla tuor. En vesta stat l'erecziun d'ina tuor da lenn egl intern. Quella duei survir sco plattafuorma da presentar la historia dil casti e dalla val. Plinavon porscha ella ina magnifica vesta sur la val.

Ucliva da Giuv

Previu ei la cuvrada dil baghetg dalla pleiv cun slondas. La damonda da sustegn finanziel ei tiel cantun.

Excursiun pils commembers/ras

En nosa regiun ei la cultura reha e meinsvart enconuschin nus struschamein ella. Per promover e far enconuschenta ella, vein nus previu da far silmeins ina excursiun ad onn enzanua ella regiun. Sin program stat la viseta d'ina cuntrada gualsra, la Val s.Pieder.

Sendas culturalas

La creaziun da sendas ella val possibilitescha il presentar differents secturs culturals. La senda romontscha, iniziada da Beinvegni Svizra, stat aunc adina en nies program e vala sco oreifra idea da presentar il romontsch e la historia sil tschancun da Rueras a Mustèr. Plinavon stat en discussiun ina senda naven dil Pass Alpsu sil vegl trasse dalla viafier giu a Tschamut. Ina senda che duei presentar la historia dalla viafier.

Nums locals

En mira stat l'elecziun d'ina grappa che sempatscha da quei sector cultural. Ils nums ein bein avon maun, mo ei maunca ina carta cun l'indicaziun dils nums. Quella lavur d'inventarisaziun ei urgenta – ils nums svaneschan, damai ch'els vegnan buca pli duvrai sco antruras e dai vinavon allas generaziuns giuvnas. Pader Ambros Widmer ha publicau 1977 l'interpretaziun dils nums ed el veva gia lu inintmau da crear ina carta. Il manteniment da quella cultura ei necessaria ed ussa era urgenta!

Exposiziun: Pietad populara

Ils davos onns ha il museum La Truaisch presentau differents temas ni eveniments en lur localitads. Il Forum cultural beneventa zun fetg quella purschida ad indigens ed jasters. La proxima duei purtar il tetel: Pietad populara. L'exposiziun presenta devoziunalias che vegnevan oravontut applicadas en casa.

Sprezza da fiug

Alla vischnaunca ei vegniu fatg amogna l'emprema sprezza da fiug en Tujetsch. Il Forum sustegn la cumpra da tala. Igl ei quei ina raritad exclusiva mo era in cletg tut special che quella ei aunc avon maun.

Ulteriur

Plinavon stat era il calender 2011 sin program. Il Forum ei aviarts per tuttas spartas culturalas e tuttas damondas da quellas varts prendein nus serius.

7. Varia

Geraua Evalina Soliva engrazia per l'activitad e lavur dil Forum. Ella selegra era che nosa radunonza hagi liug ella sala dil museum. Quei detti ina tempru e nota tut speciala per ina uniun che s'engaschi per la cultura. Ella giavischa e beneventa ina colaboraziun pli stretga denter museum e forum. Ella tschenta el miez da damonda davart las pusseivladads co intensivivar ina colaboraziun.

Plinavon menziunescha ella specialmein la presentaziun dil tom II da pader Baseli Berther ed accentuescha la rihezia dil cuntegn cultural da quella ovra. Insumma seigi la rihezia culturala enorm gronda e vasta en Tujetsch.

Bruno Berther fa attents sil vast material rimnau per l'exposiziun davart igl incendi a Selva. Ei fussi da ponderar da far cun tut quei material, las fotografias ed ils documents ina publicaziun.

Beni Hendry accentuescha la valeta dalla sanaziun dil casti da Putnengia per la val e per la historia dalla regiun. La collina cul casti seigi in tut aparti liug. El animescha il forum da far diever da quei liug sco liug da presentar teaters historics ed occurrenzas da quella tempru.

Suenter ina emperneivla radunonza cun interessents engaschai siara il president la radunonza ed engrazia a tuts pigl engaschi cultural, animond d'era plidentar il pievel e svegliar el sin ina moda ni l'otra per la cultura tuatschina. In special engraziament admetta el alla cura da dil museum, Barla Monego-Venzin, per la preparaziun dalla sala, per il puschegn ed il survetsch da survir ils presents.

La radunonza vegn terminada cun la presentaziun da fotografias dil fotograf dil vitg Sedrun, dil Thomas Schmidt. Siu fegl Robert ha regalau ina biala retscha da quellas agl archiv communal. Las fotos dueien animar da buca dismetter tals documents – cu els ein in di d'avonz. Durent il puschegn offerius dil Forum han ils presents la pusseivladad da mirar il film da Lucas Berther: Wo die Bündner Tannen rauschen – in film da 1937 che presenta nosa regiun sco regiun turistica cun ina reha cultura.

Sedrun, ils 23 da november 2009

Igl actuar

Tarcisi Hendry